

獨  
漉  
堂  
詩  
集

獨漉堂詩集卷之三

羅浮陳恭尹字元孝

增江後集

贈別

彩鳳初育羽高梧方引枝贈君如白玉追琢在今時極  
浦對遙夜新知還遠離平生頗自惜衰茶已如斯

尋家中洲於鴈水菴先寄以詩

十載無雙鯉三秋在五羊客居聞傍柳詩夢每臨塘舉  
世推能手終身泣鴈行不知違侍從元鬢幾經霜

麥叔夏齋中作

小園深巷裏一歲一來過花木自春色其如長歎何命  
知休百念老識保元和復有閒身累留連苦不多

何文止經蔚園有作兼辱寄篇依韻奉答

先公遺構此溪濱歎息年年在比鄰帳罷管絃曾幾日  
史書名姓卽于春畫圖舊壁真生草如鏡方塘漸起塵  
多謝瑤篇遠相問疎慵不稱負薪人

甘竹灘上留別何皇圖卽送之羅浮

一棹橫灘拍拍輕兩崖相揖隔灘聲已傷此地蒼茫別  
却羨名山自在行碧落歛雲峯影滿秋溪彫葉瀑流明  
他時念汝仙壇上夜半歌成日已生

初春送林叔吾入都

一鞭絲雨百花生花信隨君北到京欲借寇君還百姓  
暫曩姜被別諸兄春江雪水開茶色夜店佳人漉酒聲  
好熟黃金臺下路馬蹄終要自家行

送何不偕

離杯悵惜粵天春遠色青青稻葉新江海漸無高臥地  
鶯花如笑未行人多年攻玉同山石萬里辭根學水蘋  
南北路岐難定計許身須念白頭親

握山唁子新塘率爾寫懷因寄止齋寒塘兩兄

頻年兄弟得相依散誕江鄉共掩扉薄酒上顏開卷後

竹竿持艇探泉歸，眠貪笑語橫楮枕。出忘形骸亂著衣，今日對君唯有歎。鵜鵜隻翼不成飛。

歲暮有作

死前生後事無涯，只繫皇天不繫才。得酒直須千日臥，攤書空過十年來。身同海燕家長寄，日與河魚夜並開。淡掩柴門對童稚，一冬飛盡故園梅。

寄李相如

南方歸客盡能傳，玉貌虬鬚各宛然。馬上詩成臨戰處，幕中籌算未形先。天懸山驛三千里，醉別江船十八年。莫訝雙魚頻不到，昆池流水入西偏。

客亭逢屈泰士

山閣依依楊柳新，別君同惜少年身。  
追尋許事如前日，已覺相逢是老人。  
仗劍幾時回鳥道，攀髯無復望龍鱗。  
秋江酒醒還分手，各掩柴門到好春。

下華首臺留別旋菴海發上人

木綿花發似春風，不信登臨是歲終。  
百粵晴江山色外，六時行徑水聲中。  
自來下土爲游子，肯料東林別遠公。  
他夜相思何處望，白雲天半佛燈紅。

木綿花歌

粵江二月三月來，千樹萬樹朱華開。  
有如堯時十日出

滄海又似魏宮萬炬環高臺覆之如鈴仰如爵赤瓣熊  
星有角濃鬚大面好英雄壯氣高冠何落落後出棠  
榴枉有名同時桃杏慙輕薄祝融炎帝司南土此花無  
乃羣芳主巢鳥須生丹鳳雛落英擬化珊瑚樹歲歲年  
年五嶺間北人無路望朱顏願爲飛絮衣天下不道邊  
風朔雪寒

南海神祠古木綿花歌

祝融帝子天人傑凡材不敢宮前列挺生奇樹號木綿  
特立南州持絳節拔地孤根自攫拏排空直幹無旋折  
土氣長資渤澥寬老鱗不受冰霜裂青春二月當艷陽

觀者千人皆歎絕繁英貫日下無陰麗色燒天豈能熱  
堂堂正正勢莫當密密疎疎隨所設落瓣全鋪細草青  
飛鬚欲滿游絲纈似聞昨日銅鼓鳴海神黼黻朝天闕  
玉女三千笑口開電光一夜枝頭掣受命扶桑捧日車  
旌旗片片裁虹蜺六龍戰勝各歸來髭髯盡化元黃血  
不爾花紅何太烈君不見四照之枝不可尋赤松渺矣  
火井深爲君歲歲呈丹心

增閣歌寄薛劍公

吾友薛夫子好飲還好仙酒鐔丹鼎雜一室幽竹白石  
羅堂前更向堂西架新閣蒼翠紛紛坐前落七十二峯

流水東青天秀出芙蓉萼主人高坐烏皮几短髮蕭髻  
垂兩耳胷中萬卷心豁然筆下餘霞散爲綺才高步闊  
駭世俗文舉楊修盡兒子朝見羅浮之鶴飛晴烟夜見  
酒旗之星明上天舉觴招鶴鶴來下放身八極同周旋  
我聞此閣未得上疑是華陽洞裏三層軒會須更作通  
明客還就元龍地上眠

寄題魏和公吾廬

今之人材可屈指魏季寧都隱君子放舟溟海六月風  
繭足幽州八千里巨魚吞舟人食人白浪黃沙入睚眦  
危途曾不廢嘯歌壯心已覺齊生死往時爲我言翠微

諸峯秀出旁無依丹崖剝削下絕地石竇委曲中開扉  
虬行猿引步且伏徑盡高原見茆屋分星牛斗卽比鄰  
福地金精若奴僕良朋或近或遠方伯兄仲兄齊應行  
干戈之際獨無事花下往往聞宮商盈階况復美子弟  
講德餘暇兼文章有時雄辨相奔射偏師角立還堅壁  
有時急難相周旋首尾皆至如率然嗟哉古道久已喪  
老矣餘生復誰望聞君近者結吾廬亦擬吾廬結其上

送屈翁山之金陵

地何必生山川天何必有日月一升一沉使我老南北  
東西令人別洪河之水孤蓬根不知似我還似君神州

蕭條寰宇黑英雄失路歸何門文章亦是千秋事興則  
爲雲降爲雨雄劍高飛雌劍留夜上金陵望牛女

贈余鴻客

蜀犬不識日羣吠聲信信越人賤章甫不以易文身中  
原龍戰二十載萬事反覆如朝昏我行驚懼伏草恭舉  
國大笑爲愚人何來年少金陵子肯道相思滿人耳三  
年覓我二樵間一夕逢君五羊市傾山倒海見胷臆白  
日照燿肝腸裏羈貧無酒留君歡對坐江樓饑不起是  
時積雨江上晴丹楓亂落寒蟬鳴長風駕浪作巨壑蜃  
樓海市相崢嶸趙佗朽骨爲黃土陸賈詩書亦何補朝

臺空有漢家名浩歎今人不如古今人古人間容髮舉  
足之分邈燕越眼前得喪等烟雲身後是非懸日月怪  
君茂齡懷抱奇巖君風義兼能詩曾窺一二每心折安  
得天馬無籠駒荒城氣黑落日短強爲吾子停斯須如  
君意氣復何道所願故心終不渝

春夜同王說作王東邨程周量宿六瑩堂懷主人  
梁藥亭

南州秋色初流火西方月向梧桐墮當時歡會草堂前  
一月詞人滿高座主人命倒玉缸春小奴跪進雕盤果  
飛觥授簡恣所爲畫地書天無不可今夜草堂集吾輩

主人安在在驢背梧桐未葉月不明銀燈吐皎空相對  
簷頭急雨如揚沙飛向君前作雪花雪中旅店關山路  
欲夢何門覓君處黃金臺畔士如雲幾許風期似得君  
明朝便奮南溟翼老夫不勒北山文

送譚天水入閩

藍關秋高草色黃清溪楓落兼微霜去棹蕭蕭荻花下  
念君可是徒然者周郎千騎三山東畫堂邀客飛銀驄  
折鐺故鼎尙有耳老夫豈不聞高風風塵意氣望相識  
何況與君心莫逆心莫逆吹笙竽見故人樂何如

石湖觀梅花分得動字柬羅仲恭羅顯哉兼懷湖

主人羅澹峯

溪西千樹當時種數尺枝條柔可弄不踏湖隄向一年  
已覺繁花密無縫經過昨日此忽忽兩夕懷思不堪誦  
栽花主人隔千里花下扁舟與誰共虬髯逸興迥不羣  
公子翩翩復殊衆折簡相招到石牀新醅不惜開銀甕  
遠方英俊兼秦越滿座雄談雜嘲諷是時霜後積水清  
湖西滉漾波光動四山開朗有佳色孤嶼蕭疎欲含凍  
共誇密雪賦梁園復訝行雲入荆夢幽光漠漠去岸高  
素色鱗鱗壓枝重拂衣屢愛輕瓣飛行杯更遣濃香送  
逆風十里氣尚滿沿流百步溪猶壅高天可厭白日墜

厨人未報清尊空老夫短棹欲早歸上客班騅亦停鞚  
開牋意思已潦倒下筆詞章乃狂縱寄謝梅花勿笑人  
繇來韻險難爲用

送張南士歸山陰

八月從象郡來九月歸稽山下天生落落穆穆人姿形  
不類風塵者廣州城西東籬花酒杯偶共良朋家忽忽  
含意未及道相視顛毛俱有華著書何處期之子謝公  
精舍清暉裏雲中黃鵠安可留目送飛鴻日千里

過楊伊水西郊草堂因送之游吳越

君家草堂在西郭不遠人間似巖壑浮丘一點下平蕪

鬱水千峯映籬落觸熱相過五月中涼颺不道炎蒸惡  
開軒氣象已爽塏入座清言復元著愛君識鑒精莫倫  
過目雄雌辨飛鵲愛君墨妙不可當下筆崢嶸走龍蠖  
千年論事直指掌八法從心絕纏縛閒來爲我言素懷  
便欲從茲理忒屨尙平多累麓已畢吳越清秋有前約  
錢塘怒濤若車馬九華峯巒如劍鏑攬將明秀入毫端  
直取幽奇恣揮霍快哉壯志我所同恨不俱飛比黃鶴  
胷中約結開何時夢裏江山已成昨倚欄惆悵見千里  
落日迴風散城鐸虞翻故苑空青蠅趙尉餘基尙丹臚  
遠天暮色方掩靄近寺疎鐘滿寥廓出門一揖因送君

白頭好縱青山樂

端州閱江樓

牂牁之江千里來，羚羊峽口一線開。  
長波鼓盪氣不洩，沙邊吼怒成風雷。  
五月六月西潦至，端州古城晝常閉。  
卽今水落洲渚高，急流尚作奔揚勢。  
誰飛傑構臨江隈，下有孤石名崧臺。  
崇基崢嶸山岳立，古榕詰屈蛟螭迴。  
百道文牕浮木末，四樓角立何軒豁。  
曲閣周流複道長，高廊四注空階濶。  
猶憶登樓髮尚髻，樓前親見海龍朝。  
萬乘旌旂屯北郭，千官車馬聚寒潮。  
二十年來重繫舸，淚滴闌干獨愁我。  
白雲飛盡蒼梧淡，滿目寒山日西墮。

贈別陳季長

白玉有美不自言陳生雖訥何溫溫天球大貝在高閣  
見之使我慙輕薄問君何來東海濱蓬萊宮闕浮金銀  
峩冠仙人挾龍杖高步綽約行青雲觴傾松花大笑起  
揮手三招魯連子丈夫濟世有苦心安用辛勤求不死  
迴車萬里趨南極神州九點秋烟黑離家有子正孩提  
髮白身長不相識夜夢三山芳草春掛帆辭我別愁新  
重來肯料相見否尹也東西南北人

送程周量起復八都

英英江上雲浩浩江中水水流日下雲日高與君離隔

情如此無錢沽酒贈君別就君醉飲清歌發庭前乍響  
金風初碧樹離離照新月新月西飛向滄海海中老蚌  
含光恠珊瑚枝長犀有紋南州之寶無君對先君門下  
三千人就中程子嘗冠軍卽今賢達每不乏野人於汝  
偏情親二十年間如電掃舊時游處今荒草屈子能爭  
日月光王哀分守松楸老人生出處各有宜看君高步  
何崔嵬神龍吐氣首萬物大鵬整翮盤天池往年被命  
頒新詔千騎東方年最少磨厓手勒泰山碑把筆醉題  
尼父廟昨者麻衣反南野江上聚觀羣擁馬盛名往往  
勤時人及見恂恂一儒者滄海終爲百谷王如君氣度

誰能量從此一坏封已畢報恩身健日偏長

壽姚香山熙止

英雄之才久不作汗簡丹青殊寂寞君侯飛蓋自北來  
玉面虬鬚照南國香山孤城在海島高舶如山浪如岳  
揮鞭一指招曰來羣盜如麻皆面縛虎飽則伏鷹飽飛  
千鈞弩爲鸞發機發蹤指示畧未畢劇賊已落千重圍  
孤城許許吹霜角君侯左佩蓮花鏢馬前親繫叛人頭  
秋日俘歸五羊郭能擒能縱古所難况君生長從儒門  
大兄雄武冠宇內介弟補袞居言官天生材氣應無匹  
射策長安君第一繇來豪俊本爲民一令天涯未言屈

士元不展稱鳳雛縫裾虞詡徒區區看君不動聲與色  
萬骨欲朽今重膚我爲此歌進玉笋匪爲君壽壽天下  
太史在朝稗在野山人不是諛人者

送沈甸華歸杭州

邊沙作霾曠衢陌行子居人總成客五羊城裏三見君  
怱怱不得論心跡君驅高轂日涉野我倚長竿釣山下  
毛錐不及帶刀人牧馬童兒笑儒者夜夢西湖春興生  
歸艍正月送君行大小嶺頭雪未盡南北峯高花始明  
花光雪色遙相接花殘雪盡應停楫六橋清淺見泥沙  
潛虬何處藏鱗鬣倒盡今時別酒樽余亦著書終閉門

命駕相思何可易因風書札倘能存

晚飲湛用啮雙峯閣卽送之北上因寄程周量

秋月已向盡籬花黃幾枝北風昨夜吹木葉一一飛度  
樓南池登樓曠望見千里廓落天圍淨無滓海色爲霞  
樹外明雙峯如黛空中起龍鱗相比萬室開中有甲第  
排雲雷君家尙書明絕學自堰長江築釣臺聞孫復得  
任公子手探驪珠來赤水再獻君門雖未售南瑛何患  
無知己塞鴻搖曳向南聲行子迢遙更北征居人次第  
起相餞青衣十五調鳴箏飲君酒送君行中路秦淮雪  
正霽到日長安花始明長安雖樂未西笑因憶程生最

同調風雅曾淡海上期聲華早擅中原妙別來五載音  
問稀芙蓉闕下振朝衣憑君爲寄長相念便理雲翰追  
逐飛

贈郭清霞

丈夫名不千年朽此身須後千年老秦皇漢武爾何人  
神仙不在蓬萊島郭侯少小明陰符胸中熱血爲洪爐  
鑄成寶劍無所用却羨丹砂來海隅盡日著書言易體  
竹裏柴門長不啟十年客邸絕經營百口何曾少薪米  
誰云大道貴同塵猶自徘徊戀舊恩彭澤但題新甲子  
灞陵寧識故將軍雌雄龍吼門前水文火疑烟氣紫

白髮無憂上鬢生壯心只惜同灰死雖然不死亦奚爲  
我心未說君應知待予手弄扁舟日乞爾山中五色芝  
查將軍懷孔招同梁藥亭屈翁山凌天杓林叔吾

尹喬岳讌集東湖作

湖亭日午聞吹角秋隄柳色開蓮幕將軍飛蓋出城來  
白駒躑躅黃金絡臨階下馬肅衆賓先酌金杯揖野人  
紫羅之巾羃新果翡翠之盤行百珍湖中坎坎暮擊鼓  
玉面童兒自謠舞水影拖翻金鏤衣風聲促撥銀箏柱  
如鉤新月掛林低片片明霞飛向西潛魚躍浪白鷗起  
乾坤軒豁呈端倪帳前武士環趨走利劍在腰弓在手

何物儒生老且狂，葛衣高坐顏胡厚。將軍好士匪自今，  
脫畧禮數披胸襟。終筵敬愛不知倦，使我入夜無歸心。  
我聞衛青有揖客，信陵每下侯生色。意氣相傾古不無，  
文章感召何繇得。將軍善將兼善詩，四郊無事時復爲。  
風流高會便千古，安俟辛勤峴首碑。

贈別董蒼水

鳳凰之美不在毛，山間有鳥名寒號。區區文采欲自見，  
使我太息傷吾曹。丈夫身當能騎臂，能射姓名直冠麒。  
麟畫不然採取金匱石室書，褒貶千秋壯心魄。誰能梟  
梟兀兀作儒生，朝朝暮暮咿唔聲。我之蹭蹬不足道，看

君健筆何縱橫盛時一第易反掌况君昆弟人皆仰何  
當鼓棹恣間游七澤三湘迷所往峯頭榻得岫嘯碑蒼  
梧雲影飛參差與予相見五羊郭袖中千首南行詩爭  
奇競秀安可極滄江白石生漣漪曳履侯門心不屑懷  
刺江城字將滅強開笑口學周旋舌本猶生面顏熟寓  
樓正月多寒風狂潮打岸聲洶洶癡吟對客自搖首得  
句出戶猶書空咄嗟乎眼前富貴既無取身後空名亦  
徒苦天涯此別一潛然異日期君定何許驪龍領下徑  
寸珠因風莫惜沉香浦

送凌天杓歸金陵

前年相識花正飛今年花下送君歸珊瑚洲北一揮手  
落花如淚霑人衣看君長身美如玉上馬顧盼何光輝  
酒間意氣橫海岳筆下錯落生珠璣舊京虎踞龍盤地  
往事蒼茫足長歎秦皇枉用厭陵金劉生早識與王氣  
前輩風流安可期羨君歸去臥茅茨停梭竇婦機初下  
奉母潘郎鬢未絲東山行樂無時節南海追游暫應關  
寄余浩蕩千載心掛向秦淮滿船日

贈別王礎臣

天生豪傑將何益王郎四十爲閒客無意初從嶺外行  
因人更有黔中役高牙大旆照江潯欲駐征帆那可得

客中沽酒贈別離可惜荔枝猶未赤王郎眼大少所推  
長身廣顙好髯髭數著欲了天下事千載不受英雄欺  
走筆文章盈百紙廿史六經如瀉水魏武才堪捉佩刀  
楊修未足稱兒子去冬相識三城南一日不見思不堪  
如何棄我復遠道五溪蠻洞多烟嵐舊諳風土應無疵  
萬里爲親備甘旨醉別天涯日暮心丈夫未必終如此  
方邵村以詩序見貽賦此謝之且以送別

大暑已過風初秋金陵歸客停扁舟滿城冠蓋爭飲餞  
一日三醉尉陀樓醉來翰墨無所惜巨筆如龍飛肘腋  
盈箱絹素積未開一篇及我山中客鴻文鐵畫光陸離

義心苦調君所知枯樹王哀今老矣白頭元晏非公誰  
方公方公何瀟灑十年不復乘驄馬地生名勝恣幽人  
天與閒身作游者燕支之北昆明西羅浮日出聞天雞  
檳榔荔枝日大嚼丹砂石髓如紅泥爲君歌送君歸不  
能黃鵠比翼事四海雙犍相伴還扶犁

贈別毛行九兼寄其從父子霞

僕不與時爲俯仰雖在人間少還往逢君一揖酒未消  
當時不及論宗黨昨來再見通姓名世交於汝爲弟兄  
我父之師君從祖鳳毛麟角相崢嶸少年何處求高價  
足跡依稀徧天下笑談滿座自生風咳唾爲珠皆照夜

黃鶴高樓十載前，襄陽逋客曾周旋。  
君家名輩信傑出，後先卓犖皆英賢。  
聞將翰墨動天子，三召比來皆稱旨。  
老翁七十復何求，出處千秋在青史。  
如君健足乃絕塵，燕臺可以空羣倫。  
貧來贈別無杯酒，爲報襄陽舊隱人。

題鮑子韶獨醉圖

古之飲酒人，陶公與阮公。  
一觴一咏安足道，高天萬里嗟冥鴻。  
方其未醉時，五岳橫心胸。  
酒杯瀉作大海水，白日倒落滄溟東。  
鮑生能飲不數斗，醺然顏色如花紅。  
開口慷慨天下事，走馬來自燕昭宮。  
與子論交有世好，披圖使我題其中。  
吁嗟乎！天地變化閉塞將復開，如君磊

落跡馳真奇才把酒獨醉胡爲哉急理健翮排九垓燕  
領書生空願酒泉郡青蓮居士但築糟丘臺君不見沛  
公王業基四百壯士鴻門酒一杯

贈別查韜荒

去年梅花開君踰梅嶺來今年菊花節君歸理蘭柁天  
涯客久願君歸却惜君歸卽成別南山有鳥北張羅人  
生知己安能多况皆窮賤伏草莽吳烟越水勞經過比  
者追歡時快意左把杯盤右文字白日未盡紅燭催不  
肯相逢不沈醉南溟波浪生長風散作高言滿篋中珠  
璣錯落映四座星月倒影橫霜空朝漢高臺雉堞古伏

波故道牂牁通逢時自見各有以芟彘割裂皆人雄霸  
圖不足迴清睞麟閣千秋亦誰在己甘藿食謝當時共  
許著書傳後輩平生未識己相關與子年華未老間前  
路尙寬相見日西風莫損別離顏

送郭臯旭歸當湖

白日欲盡東方高寒雲黯黯天風號故人束裝已踰月  
欲發不發心勞勞北登大庾阻舟楫西瞻鬱水多旌旄  
同人餞送每不及各自掩戶依蓬蒿孤帆明發掛珠海  
賦詩我獨含霜毫往時有句用不得昨日事勢非前朝  
夫子文章擅時譽千金揮灑真人豪盡披肝膽與時輩

每思羽翼乘烟濤曷不歸飛向林臯岸花三月湖水濶  
爲君把釣連巨鼈請君酌酒傾葡萄青天會得開老眼  
綠鬢應須減二毛

寄李相如

李公十六生虬鬚虎頭豹眼長身軀諸生籍中弄文筆  
姓名已自聞江湖五花大馬黃金絡終日邀人講兵畧  
平原不算是賢豪季生未許矜然諾上書自獻城南田  
賣作軍門槁士錢寶刀屢試濡縷血烏府連分節鉞權  
獨當一隊江南北人對君王每前席邊頭老將避鋒芒  
白面儒官論資格與君矢志復淹留對臥飛雲百尺樓

狂歌大叫取一醉鳳觀虎視輕王侯堂前俠客千人食  
盜底屢空曾不識千金初製鸚鵡裘脫手贈人無吝色  
我時弱冠君及壯置身自許雲臺上而今絲髮生滿頭  
地北天南一相望燕山作客近何如落拓柴門未寄書  
聞道長齋習禪寂那能不飲送居諸

程周量出守桂林寄之

鳳凰昨夜銜天語天遣郎星向荆土北闕新辭紛署雲  
南行且作芄苗雨雙旌曉出都門高八桂遙開秦郡古  
一時送者皆太息千載延之今再觀紛紜飲餞日不暇  
錯落詩篇讀旁午共驚才子守一麾豈識仁人利須溥

天生賢俊以爲民坐保清華獨何取始安嶺外多阻澗  
戈甲雖銷猶疾苦生事唯應職荷鋤人家大抵稀環堵  
更加雜處有兵卒況乃流徙多浮窳兼資寬猛昔所聞  
丕變詩書亦其矩虎符龍節旣在操秋殺春生能自主  
惟君昨在司馬日眼利機明孰能伍筆前進退萬將帥  
階下驅馳半熊虎稱旨嘗聞西使秦宣恩往者東臨魯  
囊中餘智辦有餘斗大數州寧足數下國聊開歷塊蹄  
天池會理搏風羽炎州故人日相憶十年不見心如許  
方候歸艤到海涯寧知取道從湘浦白竹湖頭秋月高  
爲君一把西江鱗

放歌行答何皇圖

君不聞汗血駒墜地卽能走千里日食不能滿一石低  
首鹽車鳴不起又不聞丹穴雛覽德徘徊天路衢積粟  
如山不一顧食必竹實棲高梧古來志士不草草易得  
是饑難得飽陶公獨爲子春歌此聲千載君知道池亭  
細語暮春天出處之義何皎然相門才子有公等亞夫  
德裕安能賢四詩贈我殊霽霈三舍猶應避旌旟丈夫  
相得在中心字句形骸乃其外靈洲之氣久不開驕馬  
蹴踏朝漢臺世風披靡不可道豈無豪俊多英才陳梁  
丘海四人傑後生不識爲何來愛君意氣獨健舉欲驅

短翮乘風雷披衷置腹無矜猜嗚呼卽今誰能爲此語  
君家昔盛君尙孩安得還君舊府當三台

送離患上人住靜惠州兼懷葉許山

衆水各得月月光元在天道人無去住臨別莫悽然暑  
氣當船小峯形入閣圓因依賢地主一定出何年

贈洪藥情虞部

各有千秋志俱行萬里迴論交爲後輩相見慰從來話  
向杯前滿心當燭下灰十年滄海變老盡濟川才

臥病五羊聞故人蔡良若之子約行授室情不自

已伏枕上得二詩

汝早孤能立艱虞亦有今雖安爲國計未負帶經心讀  
易知餘慶稱詩在鼓琴先公期望意正不必華簪  
十載亾吾友中宵有淚痕何曾離夢裏容易閉泉門鶴  
髮親猶健鷓鴣雛翼漸鶩一坏仍未卜慚負不堪言

漫興 三首

借屋增江口悠悠十八年力窮羣籍內身老衆人前曲  
巷來風滿閒門得月偏有生同是寓終戀墓邊田  
簡討吟詩地江門匝海濤淵源洙泗遠磊落楚雲高近  
世無真氣斯人也自豪文章本情性笑汝小兒曹  
少師生民傑善諫何雍雍馬地飛雄筆龍墀泣劍鋒獨

當天下難乞老海頭峯百八年來事良時不可逢

出門

未有出門意篙師候水涯故人書適至江上夕初佳白  
鷺飛閒世青天人曠懷還如張翰去不復俟同儕

所見

禁裏曾通籍人前不下牀未離阿保手已縮大夫章一  
飯中人產千金匹馬裝白頭蓬室者只自愛糟糠  
繡袷紫頭巾驍騰馬上身臂鷹飛啄鳥手彈遠追人共  
竊軍符夜相邀野草春不知營一醉鄉曲幾家貧

側首

側首西南望平生李左車  
依人丹鳳闕近日碧雞書  
世事那能極爲心尙有初  
虎頭今白盡飛躍更何如

西行

掛席春風緩融融對物華  
遠天排鴈字新水育魚花  
岸曲盤干樹山寒閉數家  
依然西去路今昔不同嗟

寧都魏善伯寄示其兄弟文集率題二詩報之

一面今猶阻千秋志未孤  
把君兄弟作彷彿見蒼鬚  
有力牽衰眼多風激懦夫  
宵分涼不寐燈影落高梧

遂以文章著殊乖作者心  
道猶資化育價只待璆琳  
大地孤行迥青山一臥深  
人來問容色髮白已如今

送賴子弦任切剛歸寧都

二子何開朗來知自翠微旅中蔬飯畢江上布帆歸路  
密關心短情深出語希後期能不負家在荔枝磯

送李蒼水入國學兼寄相如

燕齊一萬里風雪幾人來岳勢晴猶白河聲撼不開新  
吟添倚馬古意滿銜杯宮是招賢舊無妨國士才  
古道今蕪絕吾鄉尙有人老於朋友內覺汝弟兄真嶺  
樹寒猶葉邊沙暖不春天涯新得叔風義好相親

送何不偕之桂林

千里西江路多奇是桂州裂山行巨浪依石上孤舟君

見他鄉葉都歸故國流應書得意句相問海東頭

秋夜王東村梁藥亭劉漢水王蒲衣梁王顧家夔

石過宿獨漉堂讀先司馬遺集有詩賦答二首

九原不可作古道更誰陳夜燭開遺草寒齋共故人星  
橫騎尾氣霜老枕戈身一讀投湘賦泉扉自此春

千古傷心地當年灑淚餘空還新息革終負賈生書絳  
闕恩雖滿蒼生望尙虛乾坤同氣在異代豈云疎

月夜姚菊里載酒招同郭清霞陶苦子鄒中和簡

文震重集鄒儀生寒玉堂同賦用空字

定懸霜天外宵來有鴈鴻樹聲風自北池影月方中良

會復能再清尊況不空登臺望星彩神劍爲誰雄

李方水疾新愈同唐明犀梁藥亭陶苦子吳山帶

何郢人問之天樂堂分得醒字

故人新勿藥美酒更開瓶雖復層城裏何妨一夕停空  
階行墜葉疎樹上寒星細數更籌笑人間夢未醒

題丹霞雪幹圖爲澹歸大師壽

絕巘全高寄孤根壓衆芳已成空谷玉如帶披垣霜世  
想和羹實天留暮歲香南枝長不老微笑傍空王

人日新晴卽事

新年連舊雨晴好獨當人兵氣昏南紀天心惜此晨遠

峯偏聳日一鳥自鳴春微斂村村急桃花何處津

春陰

春色來何處郊雲密自西釀花成大葉催雨作新泥野  
日籠無影遙峯截欲齊良苗今有喜一爲報烝黎

丹柯閣留別同梁藥亭

豈得便歸去江頭春正佳偶來唯任興小別亦傷懷履  
跡朝盈戶吟聲夜出齋南園今往矣風雅在吾儕

大海天將曙高牕燭未灰各呈詩問病自把歷占來岸  
柳隨潮映溪花到郭開兩人乘一艇半日是朝臺

春日過劉漢水李世臣於黃木山堂王東村歐陽

偉人林本茅偕至卽事分賦兼懷李鐸臣西行  
得青字

軒蓋來滌巷芳菲滿一庭小花叢作白新柳淺爲青覓  
句兼春枕揮盃到夜星永懷西上客江月自揚船

答任五陵

城闕東西路相尋不憚勞肝腸違世古詩卷與人高玉  
紙裁輕扇銀鈎落細毫經年無以報空自愧投桃

送姜山上人游南岳

送師西去重低何曾上衡山絕頂來夏帝碑蕪蟲篆徧  
楚天峯斷鴈行迴燈前鬼竽穿沙出霽後僧門鑿雪開

正是到時二三月上方明月下方雷

寄程周量

薇省仙郎安好無別來三見落庭梧西風不盡鴈初下  
明月相思天一隅內詔寫歸金鳳紙新詩擊出木難珠  
故人落魄南江上穩繫藤蓑作老夫

李相如自滇池錄示近詩率爾賦寄

游子辭鄉十九春詩加疇昔更清真粵臺風雅稀前輩  
蠻國山川老此人帳下飛書銀箭曉日邊騎馬劍花新  
眼中無限英雄淚盡化明珠寄所親

屈翁山薄游代州鎮將趙君妻以姊子本秦人也

讀其白母書詩以紀懷

寒垣提劍欲從誰，邊草年年只早衰。  
烏鳥私情愁日短，鴈門書札歎秋遲。  
新爲夫婿逢秦女，自寫佳人入楚詞。  
旦夕綵衣還侍養，一雙飛作鳳來儀。

臘月望夜湛用啗水邊新閣落成招同諸子月下  
小飲

迴塘天淨見諸峯，新閣初開月在東。  
倒影自搖牕戶裏，滿輪飛入酒杯中。  
孤村歲晚聞長笛，一葉寒聲落細風。  
漸逼春歸幸鄰近，花邊不使坐成空。

寄送蒲衣自丹霞之福州

發心初不與人言二十辭家事世尊禽鳥就齋分石鉢  
獼猴同路上山門題詩空谷吟聲應宴坐秋潭瘦影翻  
此去入閩潮水上荔枝青欖似鄉園

鶴

遠視高肩有鳳文生來不稱在人羣朱門香稻長如客  
明月滄江總爲君一種昂藏臨水岸數聲清迥落寒雲  
碧天路近飛猶懶自啄霜毛向夕曛

塵

似空如色未分明脉脉冥冥類有情鑽隙入來知態巧  
步虛遙上極身輕稍經宿雨銷沉盡又倚西風澹蕩行

增江後集  
最是貴人車馬路一回過去一層生

錢

因成形自洪爐裏冷處來希熱處過貧士橐中千日計  
五侯筵上一時歌寫將妙質傳圓月別出新裁付小荷  
只用上邊三四字從來滾愧讀書多

乞藥

癡心未肯死前休豈有丹方駐黑頭吟苦望邀來世讀  
血枯皆代昔人愁流連好夜常穿曉不出青春直過秋  
乞得老來還若此目精明似電光流

寄懷梁无悶

別來彌日把詩篇壯氣高文兩浩然  
舊劍藥爲龍入水新方期得鶴登天  
窮通一夢身何預性命兼言道始全  
竹几蒲團閒永夜三年不上臥牀眠

懷羅浮

琪樹西風粵國秋十年前記住羅浮山  
光一半來蓬島海色三更上石樓  
雲護藥苗侵臘長寺分泉響入房流  
葛洪丹井分明在一下人間漸白頭

同方蒙章酌秋月下懷梁藥亭

空階布席共良宵村浦千家帶晚潮  
秋色蒼涼風在樹冰光搖漾月當橋  
蟲經晏歲吟徧苦酒得高談力盡消

江海論心幾人在碧天相望鴈行遙

送家中洲之青原訪藥地禪師

老依江徼謝名稱門徑蒼苔日漸增遠興忽生黃菊節  
舊心期對白頭僧吟過曉岸風千樹舟並寒山夜一燈  
想到吉州攜手地石橋新瀑半爲冰

寄青原藥地禪師

駱駝峯外寶鐘撞十八灘聲湧法幢曠代才名流下界  
半天人臥在高牕新疏瀑水虹千尺迥立寒階鶴一雙  
猶有爲霖舊時望雨花空自滿西江

伍重駒移居佛山寄之

閒雲何地不堪行  
近卜村居遠郡城  
鄰曲共知元亮宅  
市人先識伯休名  
每爲禽戲聰明長  
漸見鷓鴣羽翼成  
到處頓教無疾苦  
笑他儒術濟蒼生

苦雨偶成東家牧止

溼雲寒雨苦相仍  
便是籃輿出未能  
滴水繞門前後路  
砌苔緣壁兩三層  
身牽旅夢癡難曉  
屐印春泥重不勝  
徒憶高樓垂柳下  
昨來名論對陳登

寄羅若菴

眉鬚如畫馬征南  
雖是聞聲意已淡  
旌節一移滄海上  
風流猶繫縣人心  
珠官古郡通鷓尾  
銅柱高標隔象林

身作長城無一事東風鈴閣想高吟

送家明敬

不成麟閣寫朱顏仙佛門中見一斑少學齋心求大藥  
老思行世禮名山元猿共戲當清夜白鳥隨舟下碧灣  
莫到天台便長往匣中猶有大刀環

贈胡韶先

匡廬歸路不盈旬嶺外山川久寄身一歎未忘投筆日  
十年長作曳裾人篇章每奪詞流氣甲子唯書酒國春  
生歲同君餘亦似少來多難老來貧

贈沈方鄴兼送之羅浮

夫君枉駕相尋久，賤子卑棲出見遲。  
袖裏故人勞遠字，卷中頻日捧新詩。  
水成波瀾平難得，木有文章病可知。  
各是天涯同世難，一杯重把定何期。

掛帆東近列仙家，瑤室璇房路已賒。  
高瀑倚風時作雨，遠峯含日半成霞。  
山人散住蘿葱竹，旅食多烹巨勝花。  
知有婦翁爲鮑靚，不勞丹竈問丹砂。

立秋日送梁素子之丹陽

一葉桐聲墜短檣，絺衣江上試新涼。  
路人共乞龍蛇字，詩筆相攜翡翠牀。  
第二泉香吳市近，小孤峯靄楚天長。  
臨邛令尹能迎客，不遣尊前憶粵鄉。

送曾周士還寧都兼柬翠微諸兄

一回相見一情親  
語默周旋併是真  
早得於師承學正  
似難爲弟較兄貧  
還從合浦探珠滿  
別指梅關落木新  
不遠翠微山下路  
年年空送往來人

題方龍媒園亭

幾日空亭坐不回  
主人相爲掃莓苔  
菴分茗火連僧至  
井汲香泉帶月來  
高樹蟬寒秋葉減  
方池魚躍水萍開  
閒園物色皆堪賦  
羨爾江南庾信才

送楊伯建歸豐城

嶺頭亂石老松根  
來去年年不憚煩  
古道照人如可贈

青山得汝始能言時提佛號輪珠串愛向詞塲請墨痕  
江上暫歸須有約新秋吾亦倚柴門

寄葉許山

聞君高臥江城裏宅後園林載一峯中歲身曾官小鳳  
先公名在補山龍多題逸句鐫新竹自領閒僧坐古松  
白鶴觀前湖月滿扁舟何夕此相從

贈岑梵則

江鄉溪徑引茅茨十載無忘獨到時高柳秋陰籠日薄  
小堂寒磬出花遲丹砂不秘還童訣白髮尤工幼婦詞  
今夕三城笑相看先生如舊我長髭

送魏和公歸寧都

隔年相見卽依依，知爾全家住翠微。  
窮海訪人兵後去，孤身攜劍雪中歸。  
灘平橫浦寒流淺，楓照凌江晚葉稀。  
貧賤別離那可道，寸心遙與片帆飛。

立秋日送雪樵和尚開法曹溪

濟上家風得大機，白雲高坐見人稀。  
絕無人處千花繞，欲有行時一葉飛。  
溪水生香迎桂棹，嶺猿隨衆候山扉。  
宮中賜出袈裟在，禮向西來舊祖衣。

贈吳韶著

恬淡無營古所難，十年聞著一儒冠。  
坐來門巷皆成僻，

靜到鬚眉亦帶寒  
讀易止尋遷善理  
觀心還得養生丹  
西樵山色依然在  
黃菊籬邊倚杖看

送任克家歸皖江

秋來往往動歸思  
陸賈裝中半是詩  
鴻鴈聲高相別處  
鳳凰池好待飛時  
乘車載笠將何日  
楚尾吳頭更對誰  
想得到家初雨雪  
嶺梅先有寄人枝

楚國千峯入小樓  
關干環映大江流  
夢中明月經年客  
歸興吳山昨夜秋  
菊徑乍開人並上  
秫田多熟酒新篘  
家園樂事遙堪羨  
作賦潘郎未白頭

君家有霄漢樓在皖城中盡挹長江

勝之

春日登粵王臺

花發高臺磴道遙，粵王曾此拜中朝。  
誰云七郡初歸漢，古者南交已宅堯。  
江勢急流宗渤澥，山光相望憶簫韶。  
炎州文物從來事，霸氣千年倍寂寥。

送家鞏寧

家世儒官獨典軍，紫髯三十坐高軒。  
戰旗指處無堅壘，仕路從來有孟門。  
劍長澀苔收殺氣，馬驕沙草散蹄痕。  
舊時贈客金錢盡，更向誰人受此恩。  
送何不借之潮州，兼懷家鞏寧。

醉敲如意短歌賤，鷓首東行歲漸寒。  
霜下參差聞墜葉。

月中深淺見澄灘  
龍川地古那逢令  
鱷渚魚多不避官  
猶有故人閒射獵  
秋田騎馬好追歡

春夜集丹柯閣聽蟲分賦得心字

方塘千尺在堂陰  
一片春蟲語漸深  
出蟄驚雷喧昨夜  
洗兵疎雨過前林  
希微擬共寒更轉  
斷續如知座客吟  
況是將軍鈴閣下  
聞聲倍切式蛙心

市橋春望

海門東盡不生瀾  
景物登臺極大觀  
紅蕊點村千室曙  
碧天圍水數峯寒  
珊瑚多人漁人網  
玉食先歸野客盤  
倘許閒身坐垂釣  
客星不擬落巖灘

贈林孟易

傳家世世有忠貞，斯世真堪作老生。  
聖學久窺牆數仞，佛門新禮磬三聲。  
輕身似鶴偏宜壽，全德如雞孰敢爭。  
五十年來無限事，白頭不負泰階平。

早鴈

一聲初度自衡湘，斷續天邊見幾行。  
似有驚疑同避弋，只應來去爲隨陽。  
高飛關塞何曾阻，久宿蒹葭漸有霜。  
白首蘇卿無恙在，北風時節倍思鄉。

送魏善伯之潮州

嶺頭秋盡枉高車，便向潮陽應辟書。  
行跡欲同沙塞鴈，

文章應走惡溪魚中宵剪燭論心地十載傳緘識面初  
去是英豪爲共事故人無復嘆離居

賀胡韶先舉孫

昔時見子初生子今日佳兒已抱兒家慶便多庭下綵  
鄉書遙慰鬢邊絲灰餘爐火重增皜霜後高松漸著枝  
二十年來天一轉深杯相對好開眉

彭飛雲刺史見訪

今世須才致治平古人機畧見先生剖符舊化三巴俗  
伏軾曾降七十城幕府每聞飛健檄席門何自枉高旌  
天南賤子能捫蝨坐聽高設爲洗兵

送張穆之移家東安

村浦停舟倚浪花，叩門辭我日將斜。  
殷勤說與相尋路，千歲藤邊獨一家。

舟夜

夜寒猶自擁秋衣，水底星河數鴈飛。  
空得家書無一字，滿槭稠疊寄當歸。

題畫二首

真山須似畫，安排畫出如真也。  
自佳借我壁間懸數日，清猿涼月滿書齋。

深山深處有人爭，擬寄閒身畫裏行。  
淨掃柴門無箇事，

碧溪寒葉一聲聲

蚓

一聲一恨在塗泥  
雖有清操未有知  
待化羽衣吟露日  
世人方信飲泉時

蠨蛸

獨將一面候蟲過  
饑任微生飽在他  
村舍久知無好客  
勞君門外更張羅

蜂

穿花度葉日紛紛  
出自知時處有羣  
獨佩秋蘭何處獻  
慙卿一食不念君

江上曲

雙蛾畫不成十五背孃行獨自搖蘭漿橫塘月未生

秋夕過湛泉長同賢從迪周飲於荷舫

宅邊池館似舟居布置溪橋亦自如疎樹映門涼雨後  
曲欄涵水夜星初秋來算畝收黃菊燭下輪刀鱸白魚  
酒罷分題羣從散新篇相許寄吾廬

月夜同湛用階過泉長縱飲梅花下

似雲孤起鶴孤飛一片空明立小池過客只慙依玉樹  
見花何必羨瓊枝月當瘦影徘徊見酒引濃香寂寞知  
落得滿頭君莫笑鬢毛非久亦如斯

游俠詞

左刀如白虎右劍象蒼龍直走長城北風雲滿路中  
相見一杯酒天涯卽弟兄出門贈百萬上馬不通名  
十年居委巷上有白頭親此別逢知己微軀亦借人

移家西歸留別湛克正克茂外弟兼柬同人

西還雖得邇鄉園最是難分汝弟昆春酒自澆離別地  
東風含歎鶴鴿原多年瘞玉烟猶暖當日傾巢卵幸存  
白髮漸生吾老矣幽冥將負丈人恩